



Vèwsé lèktè-la ka li— *Ka Labib ka aprann-nou ?*

CHAPIT 1

KIMOUN KI BONDYÉ ?

(**Jòb 34:10**) Alò, zòt ki sé dé nonm entélijan, kouté-mwen : vré Dyé-la pé pa aji pa méchansté é Toupuisan-la pé pa fè ayen ki mal !

(**Jòb 34:12**) Wi vréman, Bondyé pa ka fè ayen pa méchansté ; Toupuisan-la pa ka détouné lajistis.

(**Sòm 37:9-11**) Pas sé malfètè-la ké disparèt, men sa ki ka fèfon asi Jéova ké ni toutlatè pou yo. ¹⁰ On titak tan ankò, é sé méchan-la pé ké la ankò ; ou ké gadé la yo té yé la, é yo pé ké la. ¹¹ Men, moun ki ni imilité, toutlatè sé ké ta yo, é tèlman ké ni lapé, yo ké adoumanman.

(**1 Pyè 5:7**) toupannan zò ka lagé tousa ki ka trakasé-zòt asi-y, paskè i ka sousyé-y dè zòt.

(**Akt 17:11**) Sé Juif Béré la té ni on méyè atitid ki sé juif Tésalonik la, pas yo aksèpté pawòl-la èvè onlo entèrè, é chak jou, yo té ka pran tan ègzaminé Lézékriti byen pou vwè si sa yo té ka di-yo té vré.

CHAPIT 2

LABIB : ON LIV KI KA VIN DÈ BONDYÉ

(**2 Timoté 3:16**) Tout Ékriti-la, sé Bondyé ki enspiré-y é i itil pou anségné, pou korijé, pou woumèt tout biten annòd, pou fòwmé moun pou yo maché dwèt,

(**Izayi 48:17**) Mi sa Jéova [...] di : « Mwen, Jéova, an sé Dyé a-w, sila ki ka anségné-w pou byen a-w, sila ki ka gidé-w asi chimen-la ou dwètè maché la.

(**Izayi 44:27–45:2**) Sila ki ka di sé dlo-fon la : ‘Touné an vapè, é an ké fè tout rivyè a zòt vin sèk’. ²⁸ Sila ki ka di dè Siris : ‘I sé bèwjé an mwen é tousa an vlé, i ké fè-y konplètman’ ; Sila ki ka di dè Jérizalèm, ‘Yo ké viré bati-y’, é dè tanp-la, ‘Yo ké pozé fondasyon a-w.’”

45 Mi sa Jéova di sila i chwazi la, Siris, sila i tchenn men dwat a-y la pou fè nasyon bésé tèt douvan-y, pou dézawmé sé wa-la ; pou wouvè sé pòt a dé batan la douvan a-y, kifé sé pòt-la pé ké fèmé : ² « An ké

maché douvan-w, é sé mòn-la an ké mété-yo anivo. Sé pòt an kuiv la, an ké krazé-yo an timòso, é sé ba an fè la, an ké jété-yo atè.

(Nonb 23:19) Bondyé pa on nonm, pou i ka manti, a pa gason a on nonm nonplis, ki ka chanjé lidé. Lè i ka di on biten, ès i pa ka fè-y ? Lè i ka palé, ès i pa ka réyalizé sa i di ?

(Ébré 4:12) Pas pawòl a Bondyé vivan é i pui san ; i pli filé ki nenpòt épé a dé kan é i ka pèsé jiskatan i séparé nanm-la é lèspri-la, é jiskatan i séparé sé jwenti-la é mwèl-la, é i pé vwè ki lidé é ki lentansyon on moun ni andidan kè a-y.

CHAPIT 3

KA BONDYÉ NI LENTANSYON FÈ POU LIMANITÉ ?

(Jak 1:13-15) Fo pa ponmoun, lè i anba on éprèv, di : « Sé Bondyé ki ka mété-mwen a léprèv. » Pas pa ni mwayen mété Bondyé a léprèv èvè biten ki pa bon, é Bondyé limenm pa ka mété ponmoun a léprèv èvè dé biten konsa. ¹⁴ Men chakmoun anba on éprèv lè i ka lésé pwòp anvi a-y menné-y é sédui-y. ¹⁵ É apré, anvi-la, lè i fékondé, ka bay péché-la ;

é péché-la a tou a-y, lè i fèt, ka anfan-té lanmò.

(Jénèz 3:1-5) Adan tout bèt sovaj Jé-ova Dyé té kréyé ki té ka viv an savann, sé sèpan-la ki té pli pridan. Alò i mandé madanm-la : « Ès vréman Bondyé di kè zò pa ni dwa manjé adan tout pyébwa ki an jaden-la ? » ² Men madanm-la réponn sèpan-la : « Nou pé manjé fwi a pyébwa ki an jaden-la. ³ Men kanta fwi a pyébwa-la ki anmitan jaden-la, Bondyé di : “Zò pa ni dwa manjé adan-y, non, zò pa ni dwa mannyé-y, sinon zò ké mò.” » ⁴ Men sèpan-la di madanm-la : « Zò pé ké pon mò. ⁵ Pas Bondyé sav kè, menmjou-la zò ké manjé adan-y la, zyé a zòt ké wouvè é zò ké kon Bondyé : zò ké konnèt sa ki byen é sa ki mal. »

(Women 5:12) Sé konsa péché-la rantré an mond-la pa onsèl nonm, é lanmò rantré pa péché-la, kifè lanmò rantré asi toutmoun pas toutmoun té péché.

(Pwovèb 27:11) Gason an mwen, aji èvè sajès, é fè tchè an mwen plézi, pou an pé sa réponn sila ki ka chèch'an tren la.

(Danyèl 2:44) « An tan a sé wa-lasa, Dyé a syèl-la ké mété on wayòm anplas, on wayòm yo pé ké janmé détwi. É wayòm-lasa pé ké pasé an men a pondòt pèp. I ké krazé tout sé wayòm-lasa é i ké fin èvè yo, é sé li tousèl ki ké rété pou touttan.

(Jan 3:16) « Pas tèlman Bondyé té enmé lèmond, i bay sèl Gason a-y, pou tout moun ki ka montré yo ni lafwa adan-y pa détwi men ni lavi ètèwnèl.

(Jan 17:3) Mi sa lavi ètèwnèl vlé di : fò-yo rivé konnèt-vou, vou, sèl vré Dyé-la, é sila ou voyé la, Jézikri.

(Izayi 32:18) Pèp an mwen ké rété on koté ni lapé, yo ké ansékirite adan kaz a yo, é yo ké pozé dé koté ki trankil.

(Miché 4:4) Yochak ké sizé anba pyé-rézen a yo é anba pyé fig-fwans a yo, é ponmoun pé ké fè-yo pè, pas sé bouch a Jéova, chèf a sé lawmé-la, ki palé.

(Izayi 65:21-24) Yo ké fè kaz é yo ké rété adan-y, yo ké planté chan-rézen é yo ké manjé rézen. ²² Yo pé ké fè kaz pou ondòt moun rété adan-y, é sa yo ké planté la, a pa pou dòt moun manjé-y. Pas pèp an mwen ké viv lontan, menmjan ki on pyé-bwa, é sé moun-la an chwazi la ké pwofité dè travay a dé men a yo tou-bòlman. ²³ Yo pé ké travay rèd pou ayen, é yo pé ké fè timoun pou yo vwè malè rivé timoun a yo ; pas ki yo, ki pitit a yo, yo sé moun kè Jéova bényi. ²⁴ Avan menm yo kriyé, an ké réponn-yo ; alòskè yo ké ka palé toujou, an ké aji ba yo.

(Révélasyon 11:18) Men sé nasyon-la fè kolè, é kolè a-w monté osi,

é lè-la ou té fiksé la rivé pou jijé sé mò-la é pou rékonpansé èsklav a-w sé pwofèt-la é sé sen-la é moun ki ka krenn non a-w, piti kon gran, é pou détwi séla ki ka détwi latè. »

(Izayi 11:6-9) Lou-la ké rété on moman owa timouton-la, é léopa-la ké kouché owa jenn tikabrit-la, é tibèf-la, liyon-la é bèt-la yo angrésé la, yo-tout ké ansanm ; é on tigason ké menné-yo. ⁷ Fimèl-bèf-la é fimèl-lous-la ké manjé ansanm ; é pitit a yo ké kouché yonn owa lòt. Liyon-la ké manjé pay kon toro-la. ⁸ Tibébé-la ké jouvé anlè tou a on kobra, é on timoun ki pa'a tété ankò ké mèt men a-y asi tou a on sèpan ki ka lagé pwazon. ⁹ Yo pé ké fè pon mal ni pon déga adan tout montagn an mwen ki sen, pas asiré pa pétèt, konésans a Jéova ké ranpli latè kon dlo ka kouvè fon a lanmè-la.

(Izayi 65:25) Lou-la é timouton-la ké ka manjé ansanm, liyon-la ké manjé pay kon toro-la. É kanta sèpan-la, nouriti a-y sé ké pousyè. Ponmoun pé ké fè mal, é ponmoun pé ké fè pon déga adan tout montagn an mwen ki sen », mi sé sa Jéova di.

(Jan 5:28, 29) Pa trouvé sa fò, pas lè-la ka vin, é tousa ki adan sé tonm-la ké tann vwa a-y ²⁹ é yo ké sòti, sa ki fè bon biten, pou on rézirèksyon pou lavi, é sa ki té ka fè mové biten, pou on rézirèksyon pou on kondan-nasyon.

CHAPIT 4

(Filipyen 2:8) Anplisdisa, lè i vin kon on nonm, limenm montré-y toupiti, é i vin obéyisan jiska lanmò, wi lanmò asi on poto.

JÉZIKRI : KIMOUN I YÉ ?

(Jan 3:13) Anplis, pon nonm pa monté an syèl-la sòf sila ki sòti an syèl-la é ki désann, Gason-a-lòm.

(Jan 6:38) pas, si an sòti an syèl-la é an désann, a pa pou fè volonté an mwen, men sé pou fè volonté a sila ki voyé-mwen la.

(Jan 6:62) Ka ki té ké pasé menm, si zò té ka vwè Gason-a-lòm ka monté la i té yé avan ?

(Jan 17:4, 5) An ba-w glwa asi latè, an fin travay-la ou ban-mwen fè la.
⁵ Alò, konnyéla Papa, ban-mwen glwa akoté a-w, glwa-la an té ni la owa a-w avan lèmond ègzisté.

(Jan 14:28) Zò tann an di-zòt : “An ka pati é an ké wouvin owa a zòt.” Si zò té enmé-mwen, zò té’é kontan kè an k’ay owa Papa-la, pas Papa-la pli gran ki mwen.

(Matyé 9:35, 36) É Jézi té ka fè lantou a tout sé vil-la é a sé vilaj-la : i té ka anségné adan sé sinagòg-la, é i té ka préché bon nouvèl a Wayòm-la, é i té ka géri tout kalité maladi é tout kalité moun-enfim. ³⁶ Lè i vwè sé foul-la, sa fè-y lapenn pou yo, pas yo té kòché é yo té adwat-agòch kon mouton ki pa ni bèwje.

CHAPIT 5

RAISON-LA : PLI BÈL KADO BONDYÉ FÈ-NOU

(Matyé 20:28) Menmjan Gason a lòm pa vin pou yo sèvi-y, men pou sèvi é pou bay vi a-y kon on ranson pou libéré onlo moun. »

(Women 5:19) Pas, menmjan onlo moun vin péchè pas nonm-lasa tousèl pa obéyi, menmjan-la osi, onlo moun ké vin jis pas moun-lasa tousèl obéyi.

(Women 3:23, 24) Sé vré, yotout péché é ponyonn pa ka rivé atenn glwa-la Bondyé ni la, ²⁴ é sé on kado gratui Bondyé ka fè-yo, lè i ka déklaré-yo jis padavwa i ba-yo on favè yo pa mérité, pas ranson-la Kris Jézi péyé la fè-yo vin lib.

(Lik 22:19) I pran on pen osi, i fè on priyè pou di mès, i kasé pen-la, é toupannan i té ka ba yo-y, i di : « Sa, sa ka rèprézanté kò an mwen, kè an kay bay pou zòt. Kontinyé fè sa pou zòt sonjé-mwen. »

CHAPIT 6

LÈ NOU MÒ, OLA NOU KAY ?

(Éklézyas 9:5, 6) Pas lévivan sav yo ké mò ; men lémò pa konnèt ayen, é pa ni rékonpans ba yo ankò, pas moun pa ka sonjé-yo ankò. ⁶ Anplis-disa, tout enmé yo té enmé, tout hay yo té hay é tout jalou yo té jalou, tousa fin, é yo pa ka pawtisi-pé adan ayen ki ka fèt anba solèy-la ankò.

(Éklézyas 9:10) Tousa men a-w touvé a fè, fè-y èvè tout fòs a-w, pas pa ni ni travay, ni plan, ni konésans, ni sajès adan Tonm-la, la ou k'ay la.

(Jénèz 3:19) Sé èvè swé a figi a-w ou ké manjé pen jiskatan ou viré an tè-la, davwa sé la yo pran-w. Ou sé pou-syè é ou ké rètouné an pousyè-la. »

(1 Jan 4:8) Si on moun pa ni lanmou, i pa aprann konnèt Bondyé, pas Bondyé sé lanmou.

CHAPIT 7

MOUN-MÒ KÉ RÉSISITÉ !

(2 Korentyen 1:3, 4) Louwé Sila ki sé Bondyé é Papa a Ségnè an nou Jézikri, Papa-la ki ka pran penn an nou èvè tandrès é Dyé a tout konsolasyon la, ⁴ ki ka konsolé-nou adan tout éprèw an nou, pou nou pé sa konsolé séla ki ka touvé-yo adan tout kalté éprèw, èvè konsolasyon-la noumenm nou risivwè dè Bondyé.

(Jan 11:41, 42) Alò yo woté wòch-la. Aprésa Jézi lévé zyé a-y an syèl é i di : « Papa, an ka di-w mési pas ou tannmwèn. ⁴² An té sav, sé vré, kè ou toujou ka tannmwèn ; men an palé parapòt a foulmoun-la ki alantou la, pou yo pé sa kwè kè sé vou ki voyémwèn. »

(Sòm 147:4, 5) I ka konté konmen zétwal ki ni. I ka kriyé-yotout pa non a yo. ⁵ Ségnè an nou gran é i pisan toubònman ; entélijans a-y pa ni limit.

(Akt 24:15) É mi èspwa-lasa an ni an Bondyé, on èspwa kè sé nonm-lasa osi ka atann i réyalizé, sé kè i ké ni on rézirèksyon ki pou moun jis, ki pou moun ki pa jis.

(Izayi 25:8) I ké fè lanmò disparèt pou touttan ! Wi, Jéova, Pli Gran Ségnè-la, ké suiyé dlo an zyé a toutmoun. I ké woté lahont asi pèp a-y toupatou si latè, pas Jéova limenm di sa.

CHAPIT 8

KA WAYÒM A BONDYÉ YÉ ?

(Matyé 6:9-13) « Donk mi sé konsa pou zò priyé : « “Pap’an nou ki an syèl-la, fò non a-w vin sen. ¹⁰ Fò wayòm a-w vini. Fò volonté a-w fèt asi latè, kon an syèl-la. ¹¹ Ban-nou pen-la nou bizwen la jòdila. ¹² Padoné-nou péché an nou, kon nou osi nou ka padoné sa ki ka péché kont nou. ¹³ É pa fè-nou antré an tantasyon, men woté-nou anba men a méchan-la.”

(Révélasyon 14:1) Aprésa an vwè, é gadé ! Timouton-la doubout anlè Mòn Syon la, é 144 000 moun la épi-y, èvè non a-y é non a Papa-y maké asi fon a yo.

(Révélasyon 14:4) Sé séla ki pa sali-yo èvè madanm ; yo vyèj. Sé séla ki

ka kontinyé suiv Timouton-la kèlkèswa la i k'ay. Yo achté-yo pawmi lézòm konm prèmyé fwi pou Bondyé é pou Timouton-la,

(Révélasyon 12:7-10) É on lagè pété an syèl-la : Michèl é zanj a-y goumé èvè dragon-la, é dragon-la é zanj a-y goumé èvè yo. ⁸ Men a pa yo ki té pli fò, é pa té ni plas ba yo ankò an syèl-la. ⁹ Alò yo jété gran dragon-la, prèmyé sèpan-la, sila yo ka kriyé Dyab é Satan, ki ka kouyonné lèmondantyé ; yo jété-y asi latè, é yo jété zanj a-y èvè-y. ¹⁰ É an tann on gwo vwa an syèl-la ka di : « Konnyé-la, délivrans-la Bondyé ka bay la, é puisans a-y, é wayòm a Bondyé an nou, é otorité a Kris a-y, vin réyalité, pas yo jété-y, sila ki ka akizé frè an nou la, ki ka akizé-yo douvan Bondyé an nou lajouné kon lannuit !

(Sòm 37:10) On titak tan ankò, é sé méchan-la pé ké la ankò ; ou ké gadé la yo té yé la, é yo pé ké la.

CHAPIT 9

ÈSKÈ LAFEN DI MOND TOUPRÉ ?

(Ébré 10:24, 25) An-nou voyé zyé yonn asi lòt pou yonn pé sa pousé lòt ni lanmou é fè sa ki bèl, ²⁵ san nou abandoné réinyon an nou, kon sé labitid a déotwa, men fò yonn ankourajé lòt, é an-nou fè sa plis ankò davwa nou ka vwè jou-la ka rivé.

CHAPIT 10

LAVÉRITÉ ASI LÉZANJ É ASI LÉDÉMON

(Jénèz 6:2) sé gason a vré Dyé-la rann-yo kont kè fi a lézòm té bèl. Kifè yo mèt-yo ka chwazi touséla ki té agou a yo pou mayé èvè yo.

(2 Korentyen 2:11) pou Satan pa pran lanmen asi nou, pas nou konnèt lentansyon a-y byen.

(Détéwonòm 18:10, 11) Fò pa yo touvé akaz a-w ponmoun ki ka bri-

lé gason a-y oben fi a-y an difé, ponmoun ki ka chèché sav alavans sa ki ké fèt dèmen, ponmoun ki ka fè lamaji, ponmoun ki ka gadé zafè, ponmoun ki ka fè sòsyé, ¹¹ ponmoun ki ka maré moun, ponmoun ki k'ay owa gadèdzafè oben ki k'ay vwè moun ka chèché konnèt sa ki ké fèt dèmen, ni ponmoun ki ka chèché a palé èvè moun-mò.

(Pwovèb 18:10) Non a Jéova, sé on fò ki solid toubònman. Moun-la ki jis la ka kouri kaché adan-y, é i ka jwenn pwotèksyon.

(Jak 4:7, 8) Sé pousa, soumèt-zòt a Bondyé ; pawkont, doubout douvan Dyab-la, é i ké kouri lwen a zòt. ⁸ Rapwoché-zòt dè Bondyé, é i ké rapwoché-y dè zòt. Nétwayé men a zòt, zòt ki sé dé péchè, é pwòpté tchè a zòt, zòt ki an dé lidé.

POUKWA NI TOUSA SOUFRANS ?

(2 Pyè 3:9, 10) Jéova pa'a tadé pou i réyalizé pwomès a-y, kon sèwten moun ka pansé, men i ka pran pasyans èvè zòt, pas i vé pa ponmoun détwi, men i vé kè toutmoun rivé rèpanti. ¹⁰ Men jou a Jéova ké vin menmjan ki on vòlè, é jou-lasa, syèl-la ké enki disparèt adan on gwo dézòd, men tout sé biten-la ki ka fè pati a syèl-la ké vin cho toubònman é yo ké fonn, é latè èvè tousa ki ka fèt adan-y ké anba zyé a toutmoun.

(1 Korentyen 10:13) Tout sé tantasyon-la zò sibi la, sé sé menm tantasyon-lasa toutmoun ka sibi. Men Bondyé fidèl, é i pé ké jen lésé on tantasyon zò ka sibi ay pli lwen ki sa zò pé sipòté, men lè tantasyon-la ké rivé, i ké wouvè on pòt ba zòt, pou zò pé sa sipòté-y.

KA POU-W FÈ POU VIN ZANMI A BONDYÉ ?

(Sòm 55:22) Sa ki two lou ba-w, lagé-y asi Jéova, é i ké soutyennvou. I pé ké jen lésé moun-la ki jis la tonbé atè.

(Sòm 15:1-5) O Jéova, kimoun ki ké envité adan tant a-w ? Kimoun ki ké pé rété adan montagn a-w ki sakré ? ² Sé sila ki toujou ka aji byen, ki ni labitid fè sa ki dwèt é ki ka di lavérité adan tchè a-y. ³ I pa ka manti pou fè moun mal èvè lang a-y, i pa ka fè pwochen a-y ditò anponjan, é i pa ka sali répitasyon a zanmi a-y. ⁴ I pa ka mélé-y èvè vyé jan-dè-moun, men i ka onoré moun ki ka krenn Jéova. I ka tchenn a mo a-y, menm si sa ka kouté-y chè. ⁵ I ka prété lajan a-y san i mandé pon entéré asi-y, i pa ka pran lajan anba tab pou i akizé on inosan. On moun konsa pé ké jen bigidi.

RÈSPÈKTÉ VI-LA BONDYÉ BA-W LA

(Sòm 36:9) Sé owa a-w sous a lavi yé ; sé grasa limyè a-w nou ka vwè limyè.

(1 Jan 3:15) Si on moun hay frè a-y, sé on asasen, é zò sav lavi ètèwnèl pa ka rété andidan a pon asasen.

(Ègzòd 21:22, 23) « Siwvwè ni nonm ka goumé, é yo ka bouskilé on madanm ansent kifè i ka akouché avan lè a-y, si ponmoun pa mò, koupab-la ké oblijé péyé amann-la mari a madanm-la ké mandé-y péyé la ; fò i ké passé pa sé jij-la pou péyé-y. ²³ Men si madanm-la oben bébé-la mò, ou ké oblijé bay on vi pou on vi,

(Akt 15:28, 29) Pas lèsfri sen é noumenm trouvé sa bon dè pa mèl pondòt chaj asi zòt, sòf sé biten-lasa, ki nésèsè : ²⁹ pa pran sa yo sakrifé ba sé idòl-la, ni san, ni sa ki toufé é pa fè péché sèksyèl. Si zò ka entèwdi-zòt fè sé biten-lasa a san pou san, sa ké ay byen ba zòt. Pòté-zòt byen ! »

VI A FANMI A-W PÉ BÈL

(Éfézyen 5:25) Zòt sé mari-la, kontinyé enmé madanm a zòt, menmjan Lèkris té enmé lasanblé-la é bay vi a-y pou-y,

(Éfézyen 5:28, 29) Menmjan-la, fò sé mari-la enmé madanm a yo kon yo enmé pwòp kò a yo. On nonm ki enmé madanm a-y, enmé limenm a-y, ²⁹ pas pon nonm pa jen hay pwòp kò a-y, men i ka nouriy é i ka pran swen a-y, menmjan Lèkris ka fè-y pou lasanblé-la,

(Tit 2:4, 5) pou yo pé sa konséyé sé jenn madanm-la enmé mari a yo, enmé timoun a yo, ⁵ ni bon jijman, rété pwòp, travay rèd an kaz-la, toujou enmé sa ki byen, soumèt-yo a mari a yo, pou ponmoun pa malpalé pawòl a Bondyé.

CHAPIT 15

KIJAN OU PÉ RÈKONNÈT BON RÈLIJYON-LA ?

(Jan 17:17) Sangtifyé-yo èvè lavérité ; pawòl a-w sé vérité.

(Jan 17:6) « Sé nonm-la ou woté an mond-la pou pé ban-mwen-yo, an fè-yo konnèt non a-w. Yo té ta-w, é ou ban-mwen-yo, é yo kouté pawòl a-w.

(Jan 13:35) Sé konsa toutmoun ké sav zò sé disip an mwen : si zò ni lanmou yonn pou lòt. »

(Jan 3:36) Sila ki ka montré i ni fwa adan Gason-la ni lavi étèwnèl ; sila ki pa ka kouté Gason-la pé ké ni lavi, men i ké sibi kòlè a Bondyé.

(Jan 18:36) Jézi réponn : « Wayòm an mwen pa ka fè pati a mond-lasa. Si wayòm an mwen té ka fè pati a mond-lasa, sèwvitè an mwen té'é goumé pou yo pa lagé-mwen an men a sé Juif-la. Men a pa dè isidan wayòm an mwen ka vin. »

(Matyé 24:14) É bon nouvèl a Wayòm-la, yo ké préché-y toupatou

asi latè, pou i sèvi témwagnaj ba tout sé nasyon-la, é aprés lafen ké vin.

CHAPIT 16

ADORÉ BONDYÉ KON I VLÉ

(Ègzòd 20:4, 5) « Fò pa ou fè-w èstati ni ayen ki ka sanm pon biten ki anhola an syèl-la, ki asi latè, oben ki anba dlo-la. ⁵ Fò pa ou mété-w ajounou douvan yo ni lésé moun fè-w sèvi-yo, paskè mwen, Jéova Dyé a-w, an sé on Dyé ki ka mandé kè yo adoré li tousèl, ki ka pini sé gason-la pou fòt a pap'a yo, ki sé twazyèm jénérasyon ki sé katrityèm jénérasyon a séla ki haymwen la.

(Izayi 52:11) Pa rété la, pa rété la, sòti la, pa mannyé ayen ki pa pwòp ! Sòti anmitan a-y, fè ansòt pou rété pwòp, zòt ki ka pòté zouti a Jéova !

(Matyé 7:12) « Donk, tousa zò vlé moun fè ba zòt, zòt osi, fò zò fè-y ba yo. Mi sé sa Lalwa é sé Pwofèt-la ka anségné.

(Ébré 10:24, 25) An-nou voyé zyé yonn asi lòt pou yonn pé sa pousé lòt ni lanmou é fè sa ki bèl, ²⁵ san nou abandoné réinyon an nou, kon sé labitid a déotwa, men fò yonn ankourajé lòt, é an-nou fè sa plis ankò davwa nou ka vwè jou-la ka rivé.

CHAPIT 17

LAPRIYÈ : ON LONNÈ BONDYÉ KA FÈ-NOU

(Filipyen 4:6, 7) Pa enkyété-zòt dè ayen, men fè Bondyé sav ka zò vlé pou tout biten. Pousa, priyédyé é sipliye-y toupannan zò ka di-y mèsi ; ⁷ é lapé ki ka vin dè Bondyé, ki ka dépasé tousa on moun pé konprann, ké pwotéjé tchè a zòt é lèsprì a zòt grasa Kris Jézi.

(Jak 2:26) Wi, menmjan si kò-la pa ni lèsprì, i mò, menmjan-la osi, si lafwa pa ni aksyon ki k'ay èvè-y, i mò.

(Matyé 6:9-13) « Donk mi sé konsa pou zò priyé : « “Pap'an nou ki an syèl-la, fò non a-w vin sen. ¹⁰ Fò wa-yòm a-w vini. Fò volonté a-w fèt asi latè, kon an syèl-la. ¹¹ Ban-nou pen-la nou bizwen la jòdila. ¹² Padoné-nou péché an nou, kon nou osi nou ka padoné sa ki ka péché kont nou. ¹³ É pa fè-nou antré an tantasyon, men woté-nou anba men a méchan-la.”

(Révélasyon 14:6) É an vwè ondòt zanj ki té ka volé anmitan syèl-la,

é i té ni on bon nouvèl ki étèwnèl pou i anonsé toutmoun asi latè, tout nasyon, tout tribi, tout lang é tout pèp.

(Filipyen 4:13) An ni fòs pou tout biten, grasa sila ki ka ban-mwen pui-sans la.

CHAPIT 18

ÈS FÒ AN BA JÉOVA VI AN MWEN É PRAN LÈBATÈM ?

(Jan 17:3) Mi sa lavi étèwnèl vlé di : fò-yo rivé konnèt-vou, vou, sèl vré Dyé-la, é sila ou voyé la, Jézikri.

(1 Pyè 4:2) konsa, pannan tan-la ka rété-y la pou viv adan lachè, i pa ka viv ankò pou fè sa lézòm anvi, men pou fè volonté a Bondyé.

(Matyé 28:19) Donk, alé é fè disip pawmi moun a tout kalté nasyon. Batizé-yo an non a Papa-la, an non a Gason-la é an non a lèsprì sen.

RÉTÉ TOUPRÉ JÉOVA

(Matyé 22:37) I réponn-li : « “Fò ou enmé Jéova Bondyé a-w èvè tout tchè a-w, èvè tout nanm a-w, é èvè tout entélijans a-w.”

(1 Jan 5:3) Mi sa enmé Bondyé vlé di : suiv komandman a-y. É poutan, komandman a-y pa fòsan,

(1 Tésalonisyen 5:17) Priyé toutlè.

(1 Korentyen 15:58) Donk, frè an mwen kè an enmé, tchenbé fò san bigidi. Fò-zò toujou ni onlo biten a fè adan travay a Ségnè-la, paskè zò sav travay-la zò ka fè la anrapò èvè Ségnè-la pa initil.

(Kolosyen 3:13) Menmsi on moun ni on rézon dè plenn-li dè ondòt moun, fò yonn kontinyé sipòté lèt é fò yonn kontinyé padoné lèt volontyé. Menmjan Jéova padoné-zòt volontyé, sé konsa fò zò padoné-zòt osi.

